

Stäggedärne 22

D Idee

Emol, im Friejhoor 2021, hämmer d Idee gha, ufs *Jubiläum »50 Joor AG DCB«* könntemer öbbis speziells mache, well me jo nit waiss, öbbs denn scho wider kai Fasnacht git oder nit...

E Sach, wome allewyl ka bruuche, sin aigeni *Stäggedärne*, extra für uns, für die *Alti Garde*!

Spontan hämmer ys dänggt, dass es e Überraschig soll gää, dass mer numme im glaine Grai ys um das Projägg kümmere, esoo isches koo, dass numme dr *Obmaa*, dr *Erwin Erdin*, dr *Sujetobmaa*, dr *Tinli Fäh* und dr *Markus Brändle*, als *Techniker*, ybezooge worde sin. Spöter hämmer no dr *Seggelmaischter* ins Boot ghool, dr *Roland Grossebacher*. Als Mech isch drno au dr *Niggi Benz* drzuekoo, zum Schweisse!

Spöter, wo unsere Lambbe-Künschtler *Wipf*, *Rolf Wiprächtiger*, het miesse, wäge dr Gsundhait vo synere Frau Vorfait gää, hämmer no dr *Gstalter Walter*, dr *Kurt G. Walter* aagfroggt, nit dass die Lämmbli wyss blybe...

D Form

Wie gross, solle die Lambbe wärde, vor allem, was für e Form solle sy ha? Spontan, nach e baar Entwüf isch ys d Form vom Kopfladdärnli in Sinn koo, aifach öbbis grösser!

Nach Fottene und Vergrösserige hany Pläänli zaichnet und «Pösterli» uusdruggt, farbig und schwarzwyss.

Mit däne simmer zämmeghoggt und hän gmainsam entscheide, in weelere Grössy dass mr wänn wytermache.



S Material vom Gstell

Zur Uuswaal sin Holz und Metall gstande. S Gwicht hämmer abgeschetzt und mit Müschterli uff ere Woog emol teschtet. Ka me wievyl Kilo eme Vorträbler zuemuete?


Mr hämm ys für Aluminium entscheide!

D Bläch hämmer scho gha: die Deggel vo dr AG-Ladärne, wo mer em *HMB* übergää hänn, sin überzellig gsii. Die hany versäggt und mit dr glyche Sägi au viereggi Löcher uusegschnidde.

Esoo sin d Bööde und dr Deggelentstande. Für d Süüle hämmer Alu-Röörli kauft, schreeg abgeschnitte und uff die Bläch montiert. Doo-derzue hänn *TupTara*-Gwindgnöpf als Halterig dient!


Das Roogstell het dr *Niggi Benz* uff dr *Füürwach Basel*, in dr Wärggstatt zämmebrötlet, woner parallel drzue s neue Lambbegstell für die Alti Garde gschwisst het!

Soo sin d Grund-Räämli entstande, wo me het könne mit Lyynewand überzie und wie gwoont, mit haisser Gelatyne-Löösig spanne.



S Material vom Dächli

Au die vom Kopfladdärnli sin uus Kunschtstoff. Numme isch sälle Plastic für d Grössli vo däre Stäggedärnepagoode z dünn! Öbbis diggers het aanemiesse. Mit Proobestüggli het dr *Markus* allerlai Lyyim uusprobiert, bis er aine gfunde het, wo verhebbt het! S Material isch also uff *FOREX* wyss, 3mm gfallle. Die Kunschtstoffplatte hämmer in MuttENZ, bi dr Firma *Meneghello AG*, könne bezieh! (*Forex* isch geschüümtes PVC)



Als Lym isch numme dr *UHU ALLPLAST Spezialkleber* in Froog koo, alles andere het wider gloo...

S Forme vom Dächli

Au vo de Foti-Vergrösserige hets Zuesschnitt Muschter bruucht; für zwai Pagoodedächli bruucht jo 8 Zueschnitt, wo spöter no booge wärde mien! Öb ächt d Form vo dr Foti mit dr Fuege übereystimme wird und sich glääbe lot? Über das mathematische Probleem, no spöter... Zerscht emol d Entschaidig uff e Grundform und s Uusägele.

S biege vom Dächli

Das Material, wo mr gwäält hänn, losst sich bi 80°C im Baggoofe werme und drno no haiss biege! Als Form zum Biege het e 25Lt-Kunschtstoffkannischter, mit kaltem Wasser gfüllt, dient. Drno muess mes uff däre Form langsam lo Abkiele, drmits d Form bhaltet! Nach eme halbe Daag Arbet isch das esowyt gsii und y ha könne die Zwüscheprodukt wytergää.

D Hüülgschicht 1

Inere Ykaufsdäsche, ooni dass es d Cliquekamerädli am Zyschtig zoobe gsee hänn, hanyse em *Markus* zum zämme glääbe übergää...

Dää het die Däsche haimdraht und nachere Wuche wider ins Pfyffe zrugbrocht: d Präzision und d Biege isch no zweenig präzys gsii, s Glääbe isch nit gange!


Jää nu, geschääch nüt böösers, duenyse halt noochebiege...

Wie das so isch, zoobe am halber Elfi am Märt, es isch kalt und y wart ufs Dram, wo my in d Hardstroos faart, wony s Auti stoo ha. S Dram kunnt, y styng yy, aber erscht uff em Äscheblatz mergg y, dass jo die Däsche nit bymer isch! Also uss em Dram, und mit em Näggschte grad wider zrug an Märt!

Aber – doo isch kai Däsche me! Alles Sueche het nüt brocht, vo däm roote Ykaufssagg vom *Denner* isch kai Spuur me gsii. Nach eme wytere ummeluege, überall und dört au, seeny – zunderscht imene sone neue Prässcontainer – die boogene Kunschtstoffdaili, inklusiv Dachluggeböögli und s Lymdüübli...

Was machy jetzt? Aalüte! Wämm? *Stadtreinigung*! Tonbändli! Wär het äggscht e Schlüssel? D *Bolizey*! Nai, hänn sy scho bi dr *Stadtreinigung* gfroggt? Momänt y verbind se emol mit dr *Füürweer*! – *Füürwach Basel*! Nomol die ganz Gschicht verzelle, was das Züüg für mii für e Wärt het und dass es zunderscht in däm Prässcontainer liggt! Soll ys uusefische? Nai uff kai Fall: wenn das Grät öbbis im oobere Dail vo dere Kische mit em Sensor erfasst, maint sy es sygi voll und fangt aa mit Prässe! Das isch gföörli, mr wänn nit no e Saniteetsysatz... Sy könnte scho koo, aber das wurd mit Faarzüü, Mannschafft, Zyt, wartesy emol – so öbbe 6-700 Frange koschte!

Lön sys blybe, für das Gäld machy lieber alles nomol... Mittlerwyle isch halber Zwölfi verby gsii...




D Pagooode zum Zwaite

Am andere Daag hany em *Meneghello Junior* wider aaglütte und hanen bätte, nomol so Material barat z mache, y käms denn grad go abhoole!

Mit em Ooberfräser hets drno, dass es besser wird zum Glääbe, 45°-Phase an die Blatte gää. Mit zwaierlai Stanzyse sin d Löcher für d Dachluggefänschterli entstande und d Dachluggedächli sin übere Metallroor booge worde. Soo isch alles präzyser worde!

Mit Blääch und Holz, hets drno au e neu, präzyseri Bieg-Foorm bruucht, wo baratgstande isch, wenn dä Kunschtstoffzueschnitt haiss uss em Oofe kunnt.



Also nach eme wytere Daag Arbet biny wider glychwytt gsii, wie vor dr Hüllgschicht!

Dr Underschiid zu sälbetsmool: y ha die Daili nümme uss dr Hand gää, y ha e Glääbschabloone konschtruiert, wo e präzys zämmebäbbe gwäarlaischtet het! Hani gmaint...

Schlussändig hany jeedi Platte uff die ander zuegschliffe uff dr Bandschlyffmaschiine und has drno könne, Stügg für Stügg glääbe!

Numme wenn me genau luegt, seet me, dass am Ändi nümme alles am Pagoodedeggeli im rächte Winggel isch, aber es isch so guet wies halt gangen isch! Äxgysi!

Mit Kupferbroncespray sinn die baide Pagooode kupfrig gfärbt worde und für dr *Erwin* zum Eleggtrifiziere barat gsii.

D Hüllgschicht 2


Es isch mr Voorgschwäbtt, die Latärnli so biquäm wies numme goot, z belüchte.

D Ydee isch gsii, dass y e LED-Gartelämbbli, mit Laadegrät für d Batterie und Färnstüürig ybaue due, dass me die Lämbbli mit eme Gnopf im Sagg ka aa- und abmache!

Bim *JUMBO* hany im Kataloog so Lambbe gsee. Zerscht hany aifacht welle in Laade, aini go aaluege und eventuell denne grad z kaufe.


In Prattele isch s näggschte Gschäft, wo zum *COOP*-Konzärn ghört aagsiidlet. Dört sait me miir, me haig die Dinger nit, do miesime in e *Jumbo+*. Aha, wo isch dr näggscht? In Allschwyl! Biny also in das Ziegeleyareal gfaare. Nachdämm me mii in sällem Laade vo aim Gstell in andere Gang und no e ander Raion gschiggt het, het drno dr Kundedienscht uusegfunde, dass es das numme per *Online-Shop* wurd gää....

E weeneli enerviert hany drno dä Laade verloo und my trotzdäm no entschlosse, esone Dail im Internet z bstelle. Wos drno aakoo isch hani bemerggt, dass es a) zum Laade z lang het, b) zweeni lang lüüchtet



und c) für unseri Stäggedärne e weeneli z grooss isch und weme-
se d) verkeert ynnebaut, s wurd goo, aber d Färnbedienig drno
nümme fungtioniert...

Plan B: dr *Erwin* het recherchiert und Züüg zämmegstellt, beräch-
net, bstellt, glöötet und baraatgmacht, dass me die Sachesächeli
drno het könne in dr Pagoode platziere und mit ufflaadbare Bat-
terie, Sicherige, Schalterli, Laadesteggerli etc. verstegge! Die heebe
jetzt 20Stund, me miess die also numme aimool vor dr Fasnacht
ufflaade!



S wird farbiger: d Stägge



Mit lange, digge, dräggslete Düübelstüb, wo no farblich zum Objägg basse, sin die baide Latärne vervollstän-
digt worde! Speziell isch vilicht d Montage vo de Stägge: Im Boodebläch isch e groossi M12-*TupTara*-Gwind-
buggse und am Stägge e entsprächde Gwinddorn. Das het dr Vortail, dass me die Stäggeladdrnli au kaa uff e
Disch oder uff e Büünirand stelle, ooni dass me muess Stäggehalterige konschtruere...

Au d Pagoode wird kupfrig

No lang vonere wytere Hüülgschicht z schwätze, wär jetzt aber
übertriibe; aber, dass me fascht nienemee Kupferspray bikunnt, het
my doch überrascht! Allwäg syg das bsunders e giftigi Farb und
uss ökologische Gründ... und wägem CO₂, was au allewyl:
y ha drno no zwai Buxli könne erstoo und die fertige Pagoode
drmit aabloose.



Zämmebaue - usenandernää

Wie scho an unsere Kopfladärnli, gits an jeedere Pagoode vier Bölle, wo mit M6 Gwindli d Pagoode mit em
Schutzring uff s Ladärnegstell gschrubb wärdee. Für das sin im Lambbegstell im Aluminium
M6 *TupTara*-Hülse yygloo...

Aigetlig muess me die Kombinatioone numme für Reperatuure uffschruube; zum LED-Lämbbli wäggsle,
oder so. Laade und bediene ka me die nämmelig bequäm vo usse!

Wenn me die Daili usenandernimmt, sott me drfür Sorge, dass me Züüg vo dr Lambbe A nit mit sonigem
vom Ladärnli B verwäggslet, und au d Platzierig (oobe-unde-verdülle) allewyl uff d Zaiche achtet!
Numme soo basse alli Schruube dur alli Löcher!

Ummedraage

Dr DCB het im Magazin, wo neu dr *Tomi Studer* betreut, Bandalier mit
Tragbächer für Faane und so. Für unseri *Stäggedärne 22* hämmer zwai vo
däne Dinger reserviert!

Ai *Stäggedärne 22* het mit em Stägge und dr Belüchtigsyrichtig jetzt e
Gwicht vo genau 3.22Kilo.

Zu Eere vom Laddärne- und Blaggedde-Künschtler hany grad no je e
Silbrige uff die baide Lääderrieme montiert...



s Oevre vom Kurt G. I. Walter

Gspannt simmer gsii uff dr Erguss, wo unsere *Gstalter Walter* uff die wysse Lynwandsyte bämslet het!

Wonyse brocht ha zuenem, wyss und jungfräulich, isch dört grad dr Helm vomene Dambourmajor glääge.

Är syg diefzooge... Dass er dä für sy Blaggedde-Vernissasch bruuche wird, het är mir natürlig nit verroote!

Verschrogge het er numm gsait:

ou, das sin jo zwai mol vier Sytle!

Emol luege. ob y bizs zu de Summerferie fertig wird...

Är isch fertig worde! E Wuche vor dr Fasnacht hany e Mail bykoo, y könn die baide Ladärnli abhoole bynem. Erwartigsvoll biny vor dr Marschiebig, am Zyschtig vor em Morggestraich zuenem; supper!

Aini mit nur Schrift, die ander mit figürliger Moolerei.

Über alli Sytle zieht sich s Thema: ringsummeschrybe > **50 Joor Alti Garde**



Alle Betailigte und vor Allem em Künschtler gilt e härzlige Dangg zum Abschluss vo däm Jubiläumsprojäggt 50 Joor DCB Alti Garde

